

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nī cāni

1 Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo tāca jēē íyó. Te ni cajini sōho ri jeē ni cáhān yā, te ni cajito jínúū rī yā, chi ni cajito vāha ri nuū yā, te ni cajni ri yā. Te máá yá cúu Jnūhun cotecu yō nī cāni. ²Chi Yaā yáha jēē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō nī cāni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri. ³Jeē ní cajito ri jíin jēē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jíin yó jijnáhan yó. Te jendaá chi cáhiyo inuú ni yō jíin máá Tátá yō Yaā Dios jíin Séhe ya Jesucristo. ⁴Te jnūhun yáha cátee ri cuajeē nuū rō, návāha cusiī teyí ni rō jijnáhan ró.

Yaā Dios cúu luz

⁵Te yáha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú

cuīti na jniñu néé íyó jíin yá. ⁶Núu cácahān yō jeē cáhiyo inuú ni yō jíin yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūú jniñu ndaā casáha yó. ⁷Te núu cájica yó jíin luz yā jeē casáha yó jniñu ndaā, nájñūhun íyó máá yá jíin luz yā jeē sáha ya jniñu ndaā, yūcuán na te cáhiyo inuú ni yō jíin táca jnáhan yó. Te niñī maá Séhe ya Jesucristo sándoo yóhó núu ndihi cuēchi yó.

⁸Núu cácahān yō jeē tú na cuēchi yó, te cástáhú yó maá yó jeē jéni ni yō súcuan, te tu ñūhun jnūhun ndaā ini yō. ⁹Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndihi jeē neé casáha yó. Chi jíin yō jeē Yaā vāha Yaā ndaā cúu ya. ¹⁰Te núu cácahān yō jeē tú na cuēchi yó, te nájñūhun sáha yó jēē Yaā stahú cúu ya, te tu cándíje ndije yó jnúhun ya.

Cristo cúu Yaā cahán jehē yō

2 Tāca jnúhun yáha téé ri cuajeē nuū rohó jēē cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé

iin ró ní sáha cuēchi, te íyó máá Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. ²Te ni socō yā maá yá jeē ndahva yā cuēchi yó, te nasūu cuéchi máá-ni yó, chi suni cuēchi ñayuu ní ñáyiví.

³Núu squícu yó jniñu ndácu Yaā Dios nuū yō, jíin yúcuan cúcáhnú ni yō jeē jíin ndije yó ndese Yaā cúu ya. ⁴Te núu cáhán iin ñayuu: Ruhū chi jíin rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúu yó jíin yá chí tuú. ⁶Núu cáhán iin ñayuu jeē nduú i jíin yá, cánuú jéē caca ndaā i nájnūhun ni jica Jesucristo.

Jniñu jéé ndácu ya nuū yō

⁷Hermano, nasūú iin jniñu jéé ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candíje ró. ⁸Te vēsú súcuan, te níni jniñu jéé cúu, te jniñu ndaā cúu nuū Cristo jíin núu maá ró jijnáhan ró. Chi je cuayāha jniñu néé jéé iyó núu nēé, te je stéén maá luz ndaā ini anuá yō vijna.

⁹Núu iin ñayuu cahán i jeē jíca i jíin luz yā, te núu jíto uhū i jnáhan i, ñayuu ún chi jíca ga i nájnūhun nuū néé jíin cuéchi. ¹⁰Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu váha.

Te ni iin ma cúu sáha jeē quívi i cuéchi. ¹¹Te ñayuu jíto uhū jnáhan, chi íyó i nuū néé, te jíca i nuū néé. Te tu jíin i ndé chi quíhín i, chi nuū néé un ní jesi jeē tu jécūhun ni i.

¹²Róhó jéé cácuu sēhe, téé ri jnūhun yáha cuájeé nuū rō, chi jeē siquí Jesucristo te ni ine cáhnú ni Yaā Dios nuū cuéchi ró. ¹³Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeē tu ní cúu squívi jexeén rohó cuéchi.

Róhó jéé cácuu sēhe, téé ri jnūhun yáha cuájeé nuū rō, chi cájini rō ndese Yaā cúu máá Tátá yō Yaā Dios. ¹⁴Róhó tátá jijnáhan ró, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi cáhíin nihin ró, te cácandíje ró jnūhun Yaā Dios, te ni cacundeyí ró síquī jexeén.

¹⁵Ma cutóo ni rō síquī ñayiví, ni tāca jéé iyó ini ñayiví. Chi núu ndé ñayuu cutóo ni i síquī ñayiví, ñayuu ún tu íyó maní i jíin Tátá yō Yaā Dios. ¹⁶Chi tāca jéé cúu cuenta ñayiví, nasūu ndé nuū Tatá yō Yaā Dios vēji, chi cuenta ñayiví cúu. Te yúcuan cúu tāca jéé cájini ni yō jeē cuní modo neé máá yó, jíin jéé ndíyo ni yō jeē jíto yó núu, jíin jéé sandúxí yó maá yó síquī ndajniñu névaha yó. ¹⁷Te cuandihi ñayiví jíin tāca jéé ndíyo néé ni yō. Te ñayuu casáha jeē cuní maá Yaā Dios, chi cotecu i ní cáni.

Jnūhun ndaā jíin jnúhun stáhú

¹⁸Róhó jéé cácuu nájnūhun sēhe ri, cáhán rī jíin ró jeē cuandihi

quivī. Te je ni cajini jñuhun ró jéē quíji máá téē cuu contra siquī Cristo. Te nde vijna je ni canecoo cuehē tēē jeē cácuu contra siquī Cristo. Te jeē yúcuu jíni yō jeē cuándihi quivī. ¹⁹Mēhñu máá yó ni quendacoo de, te nasūu jnáhan yó cácañdije cácuu de. Chi núu jeē jnáhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jéē násūu jnáhan yó cácuu ndihi de.

²⁰Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yúcuu cájini rō jñuhun ndaā. ²¹Núu súcuu te téē ri yāha cuájēē nuū rō, siquī jeē cájini rō jñuhun ndaā, nasūu síquī jeē tu cájini rō. Te cájini rō jeē tú na jñuhun stáhú íyó nuū jñuhun ndaā.

²²¿Ndeé ñin cúu jeē cahán máni jñuhun stáhú? Suu tēē jeē cahán jeē Jesús, tu cúu ndije ya Cristo, Yaā ní tají Yaā Dios. Yúcuu cúu tēē jeē cúu contra siquī Cristo, chi tu jéjñuhún de máá Tátá yō Yaā Dios jíin Séhe ya. ²³Tāca ñayuu jeē tu jéjñuhún i Sēhe ya, suni tu íyó máá Tátá jíin i. Te ñayuu jeē jejñuhún i Sēhe ya, suni íyó máá Tátá jíin i.

²⁴Núu súcuu te chuhun vāha ni rō maá jñuhun ni cajini sōho ró ndé jeē xíhna ñuhún. Te núu ñuhun vāha ni rō jñuhun ní cajini sōho ró ndé jeē xíhna ñuhún, yúcuán na te suni ndúu ró jíin máá Tátá yō jíin Séhe ya. ²⁵Te yāha cúu jñuhun jeē ni jéjñuhun Jesucristo nuū yō: jeē cótecu yō níí cáni sáha ya.

²⁶Jñuhun yáha ní tee ri nuū rō jeē cástuhun rí siquī ñayuu cánducú stáhú rōhó. ²⁷Te máá ró jijnáhan ró,

chi ni jēhe Jesucristo Espíritu Santo, ndeé yá ini anuá rō. Te jeē yúcuu tu jíni ñuhún jéē steén ni ñin ñayuu nuū rō ndé vé cúu jendaá, chi máá Espíritu cúu jeē steén ndihi nuū rō, te steén yā jñuhun ndaā, chi tu stáhú cuíti yā. Núu súcuu te caca ndúu ró jíin Cristo, nájñuhun steén Espíritu nuū rō.

²⁸Séhē jijnáhan ró, vijna te na cáca ndúu ró jíin Cristo, návāha núu na quenda ndijin yā, te ma yūhu yó, ni ma cúcanu yō nuū yā quivī ndíji ya. ²⁹Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñayuu casáha jniñu ndaā, sēhe Yaā Dios cácuu i.

Jñuhun ñayuu cácuu sēhe Yaā Dios

3 Nacā jeē yóhoyo ni cundáhú ni Tatá yō Yaā Dios yohó, chi ni nihin yō jñuhun cuu yó séhe ya, te suu cúu ndije yó. Jeē yúcuu, ñayuu ñayiví tu cájini i jeē cúu yó séhe ya, chi tu jíin i ndese Yaā cúu máá yá. ²Ñáni mání, vijna te cúu yó séhe Yaā Dios, te ná tu cuni yō ndese coo yó níí cáni. Te je jíin yō jeē quivī quenda ndijin Jesucristo, te nduu yó nájñuhun íyó máá yá, chi coto yó núu yā ndese íyó yá. ³Te tāca ñayuu jeē súcuu ñuhun ni i, chi sándoo i ánuá i, nájñuhun íyó ndoo Jesucristo.

⁴Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. ⁵Te je cájini rō jeē ní quiji Jesucristo ini ñayiví návāha quende yā cuēchi yó. Te máá yá tú na cuēchi ya. ⁶Te tāca ñayuu jeē nduú i jíin yá, tu cájica i jíin cuēchi. Te tāca ñayuu cájica jíin cuēchi, tu jíin i ya, ni

tu jécūhun ni i ndese Yaā cúu ya.
 7 Séhē jijnáhan ró, coto ró jéē ma stáhú ni ìn i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun íyó ndáá maá yá. 8 Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snáa yā tācá jniñu néé sáha jexeén.

9 Ni ìn ñayuu jeē cúu sēhe Yaā Dios, tu jíca i jíin cuēchi, chi ni sáha Yaā Dios jeē ní nduu i nájñūhun íyó máá yá. Te ma cúu ga caca i jíin cuēchi, chi sēhe Yaā Dios cácuu i. 10 Súcuan cuni yō ndé ìn cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jéē tu cúndáhú ni jnáhan, nasūu sēhe Yaā Dios cúu i.

Jeē na cúndáhú ni yō jnáhan yó

11 Yáha cúu jñūhun jeē ní cajini sōho ró ndé jeē xíhna ñúhún: jeē na cúndáhú ni yō jnáhan yó. 12 Te ma sáha yó nájñūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siqūi jeē ñani de ni sáha jniñu ndaā te máni jniñu néé ní sáha máá de.

13 Hermano jijnáhan ró, ma cunéé ni rō te núu ñayuu ñayīvi cáquitī ni i nuū rō. 14 Te máá yó chi siqūi jeē cundáhú ni yō jnáhan yó, súcuan jíin yō jeē jé ní cācu yó jéē cótecu yō níí cáni. Te ñayuu jeē tu cúndáhú ni jnáhan, íyó i jíin jñūhun jnahñu ndetū i. 15 Chi tāca ñáyuu quitī ni nuū jnáhan, nájñūhun ñayuu jéñni ndīyi cúu i. Te cájini rō jeē ñayuu jéñni ndīyi,

ma nihín tahú i cotecu i níí cáni.

16 Jeē ni jíhī Cristo jehē yō, yúcuan cúu jeē steén cají ndese cúu jñūhun cúndáhú ni. Te máá yó, chi suni súcuan jíin ñúhún cundáhú ni yō jnáhan yó vēsú na cúu yō jehē i. 17 Te núu névāha yó jéē cótecu yō ñayīvi, te núu jíin yō jeē cúmani nuū jnáhan yó, te núu tú cundáhú ni yō i cuāha yó jéē jíin ñúhún i, núu súcuan ¿te á íyó máni yō jíin Yaā Dios, chi naún? 18 Séhē jijnáhan ró, ma cundáhú ni yō jíin máá jñūhun cáhán-ni yó, chi sa suhva na cúndáhú ndije ni yō nde jíin jniñu sáha yó.

Ndese cucáhnu ni yō jeē váha sáha yó núu Yaā Dios

19 Te súcuan cundaā ni yō jeē squícu yó jñūhun ndaā, te cucáhnu ni yō jeē váha sáha yó núu yā. 20 Chi núu ánuá yō tú vāha sáha siqūi jeē íyó cuēchi yó, te Yaā Dios chi cújéñnu ga yā vēsú ánuá yō, te jíin ndihī ya tācá un. 21 Núu súcuan ñáni máni, núu vāha sáha ánuá yō siqūi jeē tú na cuēchi yó, yúcuan na te cucáhnu ni yō jeē váha sáha yó núu Yaā Dios. 22 Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. 23 Te yáha cúu jniñu ndácu ya: jeē na cándije yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájñūhun ni ndacu ya jniñu nuū yō. 24 Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini ánuá i. Te jíin máá Espíritu jeē ni jéhe ya jeē ndeé ini ánuá yō, jíin yúcuan te jíin yō jeē ndeé Yaā Dios ini yō.

**Jnūhun jeē vēji nuū Espírítu jíin
jnūhun cáhán contra Cristo**

4 Nánī mánī, ma candíje ró táca tée jéē cácahān de jeē jíin Espírítu Yaā Dios cácanani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahān de, chí tuú. Chi ini ñayīví je ni canecoo cuehē tēe cácanani jnūhun stáhú, te cácahān de jeē ndé nuū Yaā Dios vēji. ²Te súcuan nacuni rō ndé-ni i cúu jeē jíin Espírítu Yaā Dios cahán: táca ñáyuu jeē cácahān ndaā jeē ní quiiji Jesucristo, ni nduu ya tēe, máá i cúu jeē jíin Espírítu Yaā Dios cácahān. ³Te táca ñáyuu jeē tu cájejnúhún jeē súcuan ni nduu ya tēe, máá i chi nasūu jíin Espírítu Yaā Dios cácahān i. Chi sa suhva cácuu i contra siquī Cristo. Te je ni cajini jnūhun ró jéē quíjicoo ñayuu súcuan, te vijna je cáhiyo i ini ñayīví.

⁴Séhē jijnáhan ró, máá ró cácuu sēhe Yaā Dios, te je ni cacundeyí ró siquī tēe cástáhú un. Chi jéhu ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayīví jéē castáhú. ⁵Máá i cácuu cuenta ñayīví, te jeē yúcuan cácahān i jnūhun cuenta ñayīví. Te ñayuu cácuu cuenta ñayīví, cajini nahín i jnūhun ún. ⁶Te máá yó chi sēhe Yaā Dios cácuu yó. Te ñayuu jeē cajini i ndese Yaā cúu Yaā Dios, máá i cajini nahín i jnūhun cácahān yō. Te ñayuu jeē násūu sēhe Yaā Dios cácuu, máá i tu cajini nahín i jnūhun cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

**Máni jnūhun cúndáhú
ni iyó jíin Yaā Dios**

⁷Nánī mánī, na cúndáhú ni yō jnáhan yó, chi jnūhun cúndáhú ni, nde nuū Yaā Dios vēji. Te táca ñáyuu cundáhú ni jnáhan, chi sēhe Yaā Dios cúu i, te jíní i ndese Yaā cúu Yaā Dios. ⁸Te ñayuu jeē tu cúndáhú ni jnáhan, tu jíní i ndese Yaā cúu Yaā Dios, chi mání jnūhun cúndáhú ni iyó jíin Yaā Dios. ⁹Súcuan ni steén Yaā Dios ndese cúndáhú ni yā yohó, chi ni tají yá Sēhe ya ni quiiji ini ñayīví yáha, vēsú mañúhún-ni ya iyó, návāha cotecu yō ní cáni sáha ya. ¹⁰Te yáha cúu jnūhun cúndáhú ni: nasūu jéē xíhna maá yó ni iyo maní yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiiji, návāha socō yā maá yá jeē quende yā cuēchi yó.

¹¹Nánī mánī, núu súcuan ni cundáhú ni Yaā Dios yohó, te suni súcuan cánuu jeē cundáhú ni yō jnáhan yó. ¹²Ni iin ñayuu tu ní jító cuiti nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cúndáhú ni. ¹³Te máá Espírítu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. ¹⁴Te ni cajito ri te cácastūhun rí jeē maá Tátá yō ni tají yá Sēhe ya ni quiiji návāha jnama ya ñayuu ñayīví. ¹⁵Te núu ndé ñáyuu jejnúhún i jeē Séhe Yaā Dios cúu Jesús, te ndúu i jíin Yaā Dios, te Yaā Dios ndeé yá ini i.

¹⁶Te máá yó, je ni jini yō te ni candíje yó jéē cundáhú ni Yaā Dios

yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndéé yá ini anuá i. ¹⁷Te súcuan cúu jeē íje vāha ni yō jíin jnūhun cundáhú ni, návāha ma yūhu yó quivī sándaā yā jniñu yó. Chi nájñūhun cundáhú ni Cristo, suni súcuan cándaā máá yó ini ñayīvi yáha. ¹⁸Te núu manī yō jíin yá, te tu yúhú yó nuū yā. Chi núu ni íje yó jíin jnūhun manī yō jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu íje vāha i jíin jnūhun manī i jíin yá.

¹⁹Te yóhó chi manī ndasí yó jíin Yaā Dios, chi xihna gā maá yá ni cundáhú ni yā yohó. ²⁰Te núu ñin ñayuu cahán i jeē manī i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñin ñayuu tu íyó mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. ²¹Chi je ni ndacu ya jniñu yáha nuū yō: Ñayuu jeē manī i jíin Yaā Dios, suni na cóo manī i jíin jnáhan i.

**Jeē cundeyí yó siquī jeneé
íyó ini ñayīvi**

5 Tāca ñayuu jeē cácañdije i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cácañdáhú ni i ñayuu cácuu sēhe ya. ²Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya. ³Chi jeē squícu yó jniñu ndácu Yaā Dios cúu jeē

maní yō jíin yá. Te jniñu ndácu ya chi tú vēyi. ⁴Chi tāca ñayuu cúu sēhe Yaā Dios, cundeyí i siquī jeneé íyó ini ñayīvi. Te jeē candíje yó jéē cundáhú ni yā yohó, yúcuan cúu fuerza jeē sáha jeē cundeyí yó. ⁵Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí siquī jeneé íyó ini ñayīvi.

**Jnūhun cahán ndaā
siquī Sēhe Yaā Dios**

⁶Te jeē ní quiji Jesucristo ini ñayīvi, chi ni jendute ya jíin ndute, te ni jeti niñī yā jeē ni jíhī yā jehē yō. Te nasūu máá ñin-ni jeē ní jendute ya jíin ndute, chi suni ni jeti niñī yā. Te máá Espíritu Yaā Dios cahán ndaā siquī yā, chi nuū maá Espíritu vēji jnūhun ndaā. ⁷Chi ini andiví íyó únī jeē cácañhān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúní yá, chi ñin-ni cúu ya. ⁸Te ini ñayīvi suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúní yáha, chi ñnuú-ni steén siquī yā. ⁹Te cájetáhú yó jnūhun cácañhān ndaā tēe, te jéhnu ga cúu jnūhun cahán maá Yaā Dios. Te jnūhun ni cahán yā cúu jnūhun siquī Sēhe ya. ¹⁰Ñayuu cácañdije jeē Sēhe Yaā Dios cúu Jesús, je ní cacundaā ni i jnūhun yáha jeē ni cáhān Yaā Dios. Te ñayuu jeē tu cácañdije jeē ni cáhān Yaā Dios, nájñūhun cásaaha i jeē Yaā stahú cúu ya, chi tu cácañdije i jnūhun ni cahán ndaā yā siquī Sēhe ya. ¹¹Te jnūhun ndaā un cúu jeē ni sáha ya jeē cótecu yō níí cáni, te Sēhe ya ndíso jnūhun cotecu yō.

¹²Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu iyó Séhe ya jíin i, ma nihín tahú i cotecu i.

Jnūhun consejo jeē sándīhí

¹³Jnūhun yáha tée ri nuū rohó ñáyuu cácandíje Séhe Yaā Dios, návāha cucáhnu ni rō jeē ni níhín tahú rō cotecu rō níí cáni.

¹⁴Te cúcáhnu ni yō Yaā Dios, chi jíiní yō jeē núu na vé jicán yō nuū yā jeē suni cúní maá yá, te jíiní nahín yá jeē jicán yō. ¹⁵Te núu jíiní yō jeē jíiní nahín yá jeē jicán yō, núu súcuan te suni jíiní yō jeē sáha ya jeē jicán yō.

¹⁶Núu ññ ñayuu jíiní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē

jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan. ¹⁷Tācá jniñu néé cúu cuēchi, te iyó cuēchi jeē násūu jéē jnahnú ndetū i cúu.

¹⁸Te jíiní yō jeē tāca ñáyuu cácuu séhe Yaā Dios, tu jíca i jíin cuēchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹Te jíiní yō jeē séhe Yaā Dios cácuu yó. Te ñayuu níí ñáyīvi yīhi i ndaha jexeén.

²⁰Te suni jíiní yō jeē ní quiiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō níí cáni. ²¹Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.